

Tin diferente plan na caminda:

Museo Numismatico Aruba no ta completamente cla pa reapertura

ORANJESTAD (AAN)-- Un comunicado di prensa emiti pa direccion di Museo Numismatico Aruba, ta informa lo siguiente:

Na december ultimo na 2002, señora Alice Desiree Croes a worde nombra como director di Museo Numismatico Aruba. E ta tuma e posicion over di su difunto welo (den feliz memoria) señor Juan Mario Odor, cu en principio tabata funciona sin un curpa organizatorio.

Museo Numismatico Aruba ta e prome museo di Aruba cu a worde funda na año 1975.

E museo aki tabata situa den un edificio na Zuidstraat cu tabata den un estado di decadencia y como consecuencia di esaki tur e vitrinanan y tur mueble a haya comehein.

Awor ta keda nada otro pa e museo cuminsa di nobo cu trahamento di vitrina y compra di mueble pa oficina.

Y no ta riba e tereno aki so e

museo a bay hopi atras, pero tambe riba tereno intelectual. Insuficiente atencion y subsidio di e gobiernonan anterior a pone cu e museo a lidia y a sufri hopi.

Nos trahadornan educativo tin falta di curso y foronan internacional cu nan no por a atende pa basta año pa falta di fondo.

Cu e mudamento Directie no solamente kier duna e museo un cara nobo pero tambe duna su trahadornan un chens pa educa y profesionaliza nan mes, manera mester ta pa por traha den e museo.

Directie ta purbando pa evita cueste loke cueste pa e museo cay den e situacion anterior.

Nos obhetivo ta tambe pa traha e interior semi-permanente cu un wowo pa sirbi bishitante riba tereno social, educativo y informativo.

Museo Numismatico ta carece di fondo actualmente y ta trahando duro pa logra

haya esaki. Nos mester di fondo y tempo, cual ta e yabinan pa asegura e futuro di e museo.

Museo Numismatico Aruba ta miembro di "American Numismatic Association" (ANA) pa 25 año y awor nos lo cuminsa piki e frutanan di esaki.

ANA lo yuda nos cu tipnan pa forma e museo di nobo, con pa expone e coleccion y tipnan riba efectonan di luz riba e monedanan.

Directie kier informa cu diseño di e vitrinanan, textonan visual y tambe e decor lo ta den man di nos artista local señor Renwick Heronimo, cu pronto lo entrega nos oficialmente su "project dossier".

Di otro banda señor Gerald Croes y srta. Shaileen Lee ta trahando fuertemente riba un "businessplan" di e museo.

E dos dossiernan aki ta hopi importante pa e museo por haya subsidio di fundacion-

nan cultural di Hulanda.

Directie no ta contento cu Ministerio di Cultura ta pura nan pa habri porta cueste loke cueste. Nos no ta di acuerdo cu e mentalidad di habri sint a prepara profesionalmente, of habri con cu ta.

No ta por nada e dicho: "sopi pura ta sali sali". Directie no tin intencion di pura e trabao delicado di un museo pa ningun probecho politico.

Nos ta sumamente contento cu nos a haya e edificio "Casita Geel" di gobierno, cual ta hopi mas cu loke gobierno anterior a yega di haci pa nos museo.

Pero esey no ta motibo pa gobierno interveni den nos trabao di museo y pura nos pa habri con cu bay bin. Pesey Directie ta pidi gobierno co-operacion y sosten di ministerio di cultura pa cu su trabao delicado di "inrichting" nobo di e Museo Numismatico di Aruba, cual ta esun mas

grandi den Caribe.

Directie ta pidi gobierno steun y sosten den forma di subsidio den e temporada di renovacion. Gritonan pa pura habri e museo pa caba no ta treciendo museo y gobierno mas cerca di otro, mientras esey ta locual nos ta desea.

E renovacion interior di un museo no ta mescos cu e decoracion di cualquier negoshi of cas. Museo Numismatico Aruba tin un total di mas di 50 mil pieza pa bay expone y cada un tin nan historia pa bay pone den textonan visual.

Nos mester bisa acerca cu tur esakinan ta worde haci di nobo pasobra nan tin mas cu 15 año bieu. Pa ultimo, nos ta pidi comprension atrobe di nos gobierno como tambe di nos pueblo Arubano, pasobra e museo ta bay ta pa progreso en general di nos comunidad y turismo.